

詞品附拾遺

二



品詞

遺拾附
(二)

撰慎楊

中華民國二十五年六月初版

詞

撰者楊慎

王雲五

上海

河南

南路

五

慎

編主五雲王
編初成集書叢

品

遺拾附

冊二

發行人
印刷所

商務印書館
上海及各埠館

辭品卷之四

成都楊慎升菴著

趙元鎮

趙鼎字元鎮宋中興名相小辭婉媚不減花間蘭
畹慘結秋陰一首世皆傳誦之矣點絳唇一首云
香冷金猊夢回鶯帳餘香嫩更無人問一枕江南
恨○消瘦休文頓覺春衫褪清明近杏花吹盡薄

暮寒成陣

賀方回

賀方同浣溪沙云鶯外紅銷一縷霞淡黃楊柳帶
棲鴉玉人和月折梅花○笑撚粉香歸繡戶半垂
羅幙護窓紗東風寒似夜來些此辭句句綺麗字
字清新當時賞之以爲花間蘭畹不及信然近見
玉林辭選首句二字作樓角非也樓角與鶯外相
去何啻天壤

孫浩然

一帶江山如畫風物向秋瀟灑水侵碧天何處斷
霽色冷光相射蓼嶼荻花洲掩映竹籬茅舍○雲

際客帆高掛。煙外酒旗低亞。多少六朝興廢事。盡入漁樵閑話。悵望倚層樓。寒日無言西下。此孫浩然離亭煞辭也。悲壯可傳。

查荌透碧霄

艤蘭舟。十分端是載離愁。練波送遠。屏山遮斷。此去難留。相從爭奈。心期久要。屢變霜秋。歎人生杳似萍浮。又翻成輕別。都將深恨付與東流。○想斜陽影裡。寥煙明處。雙槳去悠悠。愛渚梅幽香動。須採掇倩纖柔藍。歌粲發誰傳餘韻。來說仙遊。念故

人畱此遐州。但春風老去。秋月圓時。獨倚江樓。此
查荌透碧霄辭也。所謂一不爲少。

陳子高

陳子高名克天台人有赤城辭一卷甚工緻流麗
草堂辭愁脉脉一篇子高辭也今刻失其名

陳去非

陳去非蜀之青神人陳季常之孫也徙居河南宋
南渡後又居建業詩爲高宗所簡注而辭亦佳語
意超絕筆力排奡識者謂其可摩坡仙之壘非溢

美云草堂辭惟載憶昔牛橋一首其闌中漁家傲
云今日山頭雲欲舉青蛟翠鳳移時舞行到石橋
聞細雨聽遠住風吹却過溪西去○我欲尋詩寬
久旅桃花落盡春無數渺渺籃輿穿翠楚悠然處
高林忽送黃鸝語又虞美人云吟詩日日待春風
及至桃花開後却匆匆又點絳唇云愁無那短歌
誰和風動梨花朶又南柯子云闌干三面看晴空
背挿浮圖千尺冷煙中皆絕似坡仙語

陳去非桂花辭

茗溪漁隱曰木犀閩中最多路傍往往有參天合抱者土人以其多而不貴之漕宇門前兩徑自有二三百株至秋花盛開籃輿行清香中殊可愛也古人賦詠惟東坡倅錢塘八月十七日天竺送桂花分贈元素詩云月缺霜濃細蕊乾此花元屬桂堂仙鶯峰子落驚前夜蟾窟枝空記昔年破衲山僧憐耿介練裙溪女鬪清妍願公採襯紉幽佩莫遺孤芳老澗邊陳去非有辭云黃衫相倚翠葆層底八月江南風日美弄影山腰水尾○楚人未識

孤妍離騷遺恨千年無住菴中新夢。一枝喚起幽
禪。万俟雅言有辭云芳菲葉底誰會秋工意深綠
叢輕黃。怕青女霜侵憔悴。開分早晚都占九秋天
花四出香七里。獨步珠宮裏。佳名巖桂。却因是
遺子不自月中來。又那得蕭蕭風味。霓裳舊曲休
問廣寒人。飛太白酌仙蕡。香外無香比。文昌雜錄
云京師貴家多以酴醿漬酒。獨有芬香而已。近年
方以模楂花懸酒中。不怕酸郁可愛。又能使酒味
辛冽。始終戚里外人蓋所未知也。

葉少蘿

葉少蘿名夢得號石林居士妙齡秀發有文章盛名石林辭一卷傳于世賀新郎睡起流鶯語虞美人落花已作風前舞皆其辭之入選者也中秋晏客念奴嬌末句云廣寒宮殿爲余聊借瓊林英英獨照者

曾空青

曾紓字公袞號空青先生子宜之子清樾軒二詩名世辭亦佳其臨江仙云後院短牆臨綠水春風

急管絲絃向誰親。按小嬋娟玉堂天上客。琳館地行仙。○安得此身長是健。徘徊夜飲朝眠。江南刺史湯垂涎。安排腸已斷。何況到樽前。又菩薩蠻。山光冷浸清江底。江光只到柴門裡。臥對白蘋洲。欹眠數釣舟。亦佳。惜全篇未稱。

曾純甫

曾覲字純甫。號海野東都故老。見汴都之盛。故辭多感慨。金人捧露盤是也。採桑子云。花裡遊蜂宿。粉棲香錦繡中。爲當時傳歌。

曾覲張掄進辭

曾覲進辭賦遂進阮郎歸云、柳陰庭院占風光、呢
喃春晝長、碧波新漲小池塘、雙雙跳水忙、○萍散
漫、絮飛揚、輕盈體態狂、爲憐流水落花香、銜將歸
畫梁、旣登舟、知閣張掄進柳稍青云、柳色初濃、餘
寒似水、纖雨如塵、一陣東風縠紋微皺、碧沼鱗鱗
○仙娥花月精神、奏鳳筦鸞弦鬪新萬歲聲、中九
霞盃內、長醉芳春曾覲和進云、桃臙紅勻、梨腮粉
薄、鴛徑無塵、鳳閣凌虛龍池澄碧、芳意鱗鱗、○清

時酒聖花神。看內苑風光又新。一部仙韶。九重鸞仗。天上長春。

雪辭

紫皇高宴仙臺雙成戲擊瓊苞碎。何人爲把銀河水剪甲兵都洗。玉樣乾坤八荒同色了無塵翳喜冰消太液煖融鵝鵠端門曉班初退。○聖主憂民深意轉鴻鈞。滿天和氣太平有象三官二聖萬年千歲。雙玉盃深五雲樓迥不妨頻醉。看來不是飛花。片片是豐年瑞。太上大喜賜鍍金酒器二百兩。

月辭

曾覩進壺中天辭云、素飈漾碧、看天衢、穩送一輪明月。翠水瀛壺人不到、比似世間秋別。王手瑤笙一時同色。小按霓裳疊、天津橋上有人偷記新闋。○當日誰幻銀橋阿、瞞兒戲。一笑成痴絕、肯信羣仙高宴處、移下水晶宮。闕雲海塵清、山河影滿桂冷吹香雪、何勞玉斧金颺。千古無缺、上皇大喜曰、從來月辭、不曾用金甌。事可謂新奇、賜金束帶、紫番羅、水晶盃上亦賜寶醕。至一更五點還宮、是夜

西興亦聞大樂焉。

潮辭

江潮亦天下所獨。宣諭侍官各賦。酌江月一曲。至晚呈上。以吳琚爲第一。其辭曰。玉虹遙挂。望青山隱隱如一抹。忽覺天風吹海立。好似春霆初發。白馬凌空。瓊鼇駕水。日夜朝天闢。飛龍舞鳳。鬱葱瓌拱吳越。○此景天下應無。東南形勝。偉觀真奇絕。好是吳兒飛綵幘。楚起一江秋雪。黃屋天臨。水庫雲擁。看擊中流楫。晚來波靜。海門飛上明月。兩宮

賞賜無限至月上始還

張材甫

張材甫名掄，南渡故老，辭多應制。元夕雙闕中天，一首鱣華感慨已入選矣。詠瑞香花：西江月剪就碧雲團葉，刻成紫玉芳心。淺春不怕嫩寒，侵暖徹薰籠瑞錦。○花裡清芬獨步樽前，勝韻難禁飛香，直到玉盃深消得。厭夜飲，又柳梢青前段云：柳色初勻，輕寒如水，纖雨如塵。一陣東風縠紋微皺，碧沼鱗鱗亦佳，足稱辭人。

朱希真

朱希真名敦儒，博物洽聞，東都名士也。天資曠遠，有神仙風致。其西江月二首辭淺意深，可以警世之役役於非望之福者。草堂入選矣，其相見懼云：東風吹，又江梅採花開。舊日吳王宮殿長青苔。○今古事英雄淚。老相催。常恨夕陽西下。晚潮回鶼鷀。天云檢盡。暦頭冬又殘。愛他風雪耐。他寒拖條竹杖。家家酒上箇籃輿處處山。○添老大轉痴頑。謝天教我老年間。道人還了鴛鴦債。紙帳梅花醉。

夢間其水龍吟末云奇謀報國可憐無用塵昏白羽鐵鎖橫江錦帆衝浪孫郎苦亦可知其爲人矣

李似之

李似之名彌遜仙井監人自號筠翁宋南渡名士不附秦檜坐貶有別友苦薩蠻一首云江城烽火連三月不堪對酒長亭別休作斷腸聲老來無淚傾○風高帆影疾目送舟痕碧錦字幾時來薰風無鴈回

張安國

張孝祥字安國蜀之簡州人四狀元之一也後卜居歷陽平昔爲辭未嘗著稿筆酣興健頃刻卽成無一字無來處如歌頭凱歌諸曲駿發蹈厲寓以詩人句法者也有于湖紫微雅辭一卷湯衡爲序云云其詠物之工如羅帕分柑霜落齒冰盤剝芡珠盈掬寫景之妙如秋淨明霞乍吐曙涼宿靄初消麗情之句如佩解湘腰釵孤楚鬢不可勝載

于湖辭

于湖玩鞭亭晉明帝覩王敦營壘處自溫庭筠賦

詩後，張文潛又賦于湖曲以正湖陰之誤，辭皆奇麗警拔，膾炙人口。徐寶之韓南澗亦發新意。張安國賦：滿江紅云千古淒涼興亡事，但悲陳迹凝望眼。吳波不動楚山空碧，巴滇綠駿追風遠。武昌雲旆連天赤，笑老姦遺臭到如今留空壁。○邊書謠：烽烟息通輶傳，銷鋒鏑仰太平天子。聖明無敵蹙踏揚州開帝里，渡江天馬龍爲匹。看東南佳氣鬱葱葱，傳千億。雖間采溫張語，而辭氣亦不在其下。嘗見安國大書此辭後題云：乾道元年正月廿日。

筆勢奇偉可愛。○建康實錄唐許嵩所著者亦稱
湖陰云云庭筠之誤有自來矣、

醉落魄

張于湖醉落魄辭云輕寒澹綠可人風韻閒梳束
多情早是眉峰蹙一點秋波閒裡覩人毒○桃花
庭院閒妝束銅鞮誰唱大堤曲歸來想是櫻桃熟
不道秋千誰伴那人蹴此辭毒楚二字難下○醉
落魄元曲訛爲醉羅歌

史邦卿

史邦卿名達祖號梅溪今錄其萬年歡一首亦鼎之一籌也。兩袖梅風謝橋邊猶帶陰雪過了匆匆燈市草根青發燕子春愁未醒誤幾處芳音遼絕煙谿上採綠人歸定應愁沁花骨○非干厚情易歇奈燕臺句老難道離別小徑吹衣曾記故里風物多少驚心舊事第一是侵階羅襪如今但柳髮稀春夜來和露梳月春雪辭云行天入鏡都做出輕鬆纖軟寒爐重暖便放慢春衫針線恐鳳鞋挑菜歸來萬一灞橋相見此句尤爲姜堯章拈出輕

鬆纖軟元人小令借以詠美人足云又元夕醉羞
醉玉少年半度懷豔雪舊家伴侶醉玉生春出蘭
畹辭豔雪出韋詩語精字鍊豈易及耶

杏花天

史邦卿杏花天辭云軟波拖碧蒲芽短畫樓外花
晴柳暖今年自是清明晚便覺芳情較懶春衫
瘦東風剪剪逼花鳥香吹醉面歸來立馬斜陽岸。
隔水歌聲一片姜堯章云史邦卿之辭奇秀清逸
有李長吉之韻蓋能融情景於一家會句意於兩

得姜亦當時辭手而服之如此。

姜堯章

姜夔字堯章，號白石道人。南渡詩家名流，辭極精妙，不減清真樂府。其間高處，有周美成所不能及者。善吹簫，自製曲，初則率意爲長短句，然後音律云其詠蟋蟀齊天樂一辭最勝。其辭曰：庚郎先自吟愁賦，淒淒更聞私語。露濕銅鋪苔侵石井，都是曾聽伊處哀音似訴。正思婦無眠，起尋機杼，曲曲屏山夜涼，獨自甚情緒。○西窗又吹暗雨，爲

誰頻斷續相和砧杵。候館吟秋離官吊月。別有傷心無數。邠詩漫與笑籬落呼燈。世間兒女寫入琴絲。一聲聲更苦。其過茗雪云拂雪金鞭欺寒茸帽。不記章臺走馬鴈磧沙平漁汀人散。老去不堪遊冶人日辭云池面冰膠牆頭雪老雲意還又沉沉朱丘粘雞金盤簇燕空歎時序侵尋湘月辭云歸禽時度月上汀洲冷中流容與畫橈不點清鏡從柳子厚綠淨不可唾之語翻出戲張平甫納妾云別母情懷隨郎滋味桃葉渡江時翠樓吟云檻曲

紫紅簷牙飛翠。酒破清愁。花銷英氣。法曲獻仙音。
云過秋風未成歸計。重見冷楓紅舞。玲瓏四犯。云
輕盈喚馬。端正窺戶。酒醒明月下。夢逐潮聲去。其
腔皆自度者。傳至今不得其調。難入管弦。祇愛其
句之奇麗耳。

高賓王

高觀國字賓王。號竹屋。辭名竹屋痴語。陳造爲序。
稱其與史邦卿皆秦周之辭所作。要是不經人道。
語其妙處。少游美成亦未及也。舊本草堂詩餘選。

其玉胡蝶一首書坊翻刻欲省費潛去之于家藏
有舊本今錄于此以補遺略焉喚起一襟涼思未
成晚雨先做秋陰楚客悲殘誰解此意登臨古臺
荒斷霞斜照新夢黯微月疎砧撓難禁盡將幽恨
分付孤斟○從今倦看青鏡旣遲勲業可負煙林
斷梗無憑歲華搖落又驚心想尊汀水雲愁凝去聲
閒蕙帳猿鶴悲吟信沉沉故園歸計休更侵尋又
詠轎御街行云藤筠巧織花紋細稱穩步如流水
踏青陌上兩初晴嫌怕溼文鴛雙履要人送上逢

花須住。纔過處。香風起。○裙兒掛在簾兒裡。更不
把窓兒閉。紅紅白白簇花枝。恰稱得尋春芳意歸。
來時晚。紗籠引道。扶下人微醉。他如秋懷喜遷鶯。
吊青樓永遇樂。皆佳作也。

盧申之

盧申之名祖臯。邛州人。有蒲江辭一卷。樂章甚工。
字字可入律呂。彭帥於吳江作釣雪亭。擅漁人之
窟宅。以供詩境也。約趙子野翁靈舒諸人賦之。惟
甲之擅塲。江涵鷗影。梅花瘦。四無塵。雪飛風起。夜

窓如畫。其警句也。水龍吟詠茶靡云。蕩紅流水無聲。暮烟細草粘天遠。低回倦蝶。往來忙燕。芳期頓懶。綠霧迷牆。翠虬騰架。雪明香暖笑依依。欲挽春風教住。還疑是相逢晚。○不似梅妝瘦減。占人間半神蕭散。攀條弄盡天涯。猶記曲闌小院。老去情懷。酒邊風味。有時重見。對枕幃空想東牀舊夢。帶將離怨。洞仙歌詠茉莉云。玉肌翠袖。較似酴醿瘦。幾度熏醒夜。窓酒問炎州。何許清涼處。不到冰嬉剪就。○晚來庭戶悄。暗數流光。細拾芳英。黯回首。

念日暮江東偏爲魂銷人易老幽韻清標似舊正
簾紋如水帳如烟更奈問月明露濃時候

劉改之辭

新來塞北傳到真消息赤地居民無一粒更五單
于爭立○維師尚父鷹揚熊羆百萬堂堂看取黃
金假鉞歸來異姓真王又云堂上謀臣樽俎邊頭
將士干戈天時地利與人和燕可伐與曰可○今
日樓臺鼎鼐明年帶礪山河大家齊唱大風歌不
日四方來賀世傳辛幼安壽韓侂胄辭也又一首

小陶韻聲多俚談不錄近讀謝疊山文論李氏繫
年錄朝野襍記之非謂乾道間幼安以金有必亡
之勢願召大臣預脩邊備爲倉卒應變之計此憂
國遠猷也今摘數語而曰贊開邊備劉過小辭曰
此幼安作也忠魂得無冤乎故今特爲拈出

天仙子

劉改之赴試別妾天仙子云別酒醺醺渾易醉回
過頭來三十里馬兒不住去如飛行一憩來牽一
憩斷送殺人山共水○是則是功名終可喜不道

恩情拋得未。梅村雪店酒旗斜去也。是住也是煩惱。自家煩惱你。辭俗意佳。世多傳之。又小說載曹東畎赴試步行。戲作紅窓迥慰其足云。春闌期近也。望帝鄉迢迢猶在天際。懊恨這一雙脚底。一日廝趕上五六十里。○爭氣扶持我上。轉得官歸時賞你。穿對朝靴。安排你在轎兒裡。更選對宮樣鞋兒。夜間伴你睡。其辭雖相似。而不及改之遠甚。○

曹東畎名幽。字西士。

嚴次山

嚴仁，字次山，辭名清江欸乃，其佳處有粘雲江影。
傷千古流不去，斷魂處之句，又長于慶壽贈行灑。
然晚俗如壽蕭禹平云，雲表金莖珠璀璨。當日投
懷驚玉燕，文章議論壓西崑。風流姓字翔東觀，贈
歐太守云坐嘯清香畫戟聽。丁丁滴花晴漏棠陰
晝寂，賡賓客竹枝楊柳送別云相逢斜柳綺輕舟。
渚香不斷蘋花老，又窓兒上幾條殘月，斜界羅帷。
皆是當時膾炙。

吳大年

吳億字大年。南渡初人。元夕樓雪初消一首。入選予愛其南鄉子一首云。江上雪初消。暖日晴煙弄柳條。認得裙腰芳草綠。魂銷曾拆梅花過斷橋。○蟬鬢爲誰凋。長恨含嬌韌處嬌。遙想晚妝呵手罷。無聊更朱唇暖玉簫。

張功甫

張功甫名鑑。有玉照堂辭一卷。玉照堂以種梅得名。其辭多賞梅之作。其佳句如光搖動一川銀浪。九霄珂月。又宿雨初乾。舞梢煙瘦。金絲裊粉圍香。

陣擁詩仙，戰退春寒峭。皆詠梅之作，雖不驚人，而風韻殊可喜。

賀新郎

張功甫善填辭，嘗卽席作賀新郎，送陳退翁分教衡湘云。桂隱傳丕處，有風流千巖勝韻。太丘遺譜玉季金崑霄漢侶，平步鸞坡揮塵莫便駕飛飄煙渚雲動精神衡岳去，向君山帝野鏘韶濩蘭蕙畹。吊湘楚○南湖老矣無襟度。但樽前踉蹌醉影帽花顛仆。只恐清時專文教。猶貸陰山狂虜臥玉帳。

貔貅鉦鼓忠烈前勲賚萬恨。望神都魏闕奔狐兔。
呼翠袖爲君舞。此辭首尾變化送教官而及陰山。
狂虜非善轉換不及此。末句呼翠袖爲君舞六字。
又能挽回結煞。非千鈞筆力。未易到此。辛稼軒有
憑誰換取。盈盈翠袖。搵英雄淚。此末句似之。

吳子和

選
吳子和名禮之錢塘人。有閨元宵喜遷鶯一辭入

鄭中卿

鄭中卿名域，三山人。號松窓。使虜回有燕谷剽聞。
二卷紀虜事甚詳。昭君怨詠梅一辭云：道是花來
春未。道是雪來香異。水外一枝斜。野人家。○冷淡
竹籬茅舍。富貴玉堂瓊榭。兩地不同栽。一般開興。
比甚佳。麗情云：合是一釵雙燕。却成兩鏡孤鸞。樂
府多傳之。

謝勉仲

謝勉仲，名懋，號靜寄居士。吳伯明稱其片言隻字，
憂玉鏘金，醞藉風流，爲世所貴云。其七夕鵲橋仙

一辭入選，釣簾借月是也。若餘醒未解，抹頭懶屏，裡瀟湘夢遠，亦的的佳句。

趙文鼎

趙文鼎，名善扛，號解林居士。其春遊重疊金云、楚宮楊柳依依碧。遙山翠隱橫波溢，絕艤照濃春。春光欲醉人。○纖纖芳草嫩，微步輕羅襯。花戴滿頭歸，遊蜂花上飛。其二：玉閣芳草粘天碧，春風萬里思行客。騎馬向風嘶，道歸猶未歸。○南雲新有鴈，望眼愁邊斷。膏沐爲誰容，日高花影重。重疊金、卽

菩薩蠻也。又十拍子一闋亦佳。

趙德莊

趙德莊名彥端，有介菴辭一卷。清平樂一首云：桃根桃葉一樹芳，相接春到江南二三月。迷損東家蝴蝶。○殷勤踏取春陽風，前花正低昂與我同心。梔子報君百結丁香爲集中之冠。

易彥祥

易祓字彥祥，長沙人。寧宗朝解褐狀元。草堂辭。葛山溪海棠枝上留取嬌鶯語。其所作也。

李知幾

李石字知幾，號方舟。蜀之井研人。文章盛傳有續博物志。辭亦風致草堂選煙柳疎疎。人悄悄。其夏夜辭也。贈官妓辭。有暖玉倚香愁黛翠。勸人須要人先醉。問道明朝行也。未猶自記燈前背立偷垂淚。好事者或改偷爲佯。

危逢吉

危逢吉名禎。有吳齋辭一卷。其詠笠篴漁家傲云。老去諸餘情味淺。詩情不上。間釵釧寶幌。有人紅。

兩磨簾間見紫雲。元在深深院。○十四條弦音調遠柳絲不隔芙蓉面。秋入西窓風露晚。歸去懶酒酣。一任烏巾岸。按箜篌本二十三弦。十四弦蓋後世從省。非古制矣。

劉巨濟

劉涇字巨濟。簡州人文。曰前漢集。其夏初臨辭。小橋飛蓋入橫塘。今刻本飛下落一蓋字。

劉巨濟僧仲殊

張樞吉龍圖守杭。一日湖上開宴。劉涇巨濟僧仲

殊在焉。樞言命卽席作填辭。巨濟先倡曰。憑誰好筆。橫掃素縑三百尺。天下應無。此是錢塘湖上圖。仲殊應聲曰。一般奇絕。雲淡天高秋夜月。費盡丹青。只這斐兒畫不成。樞言又出梅花邀二人同賦。仲殊曰。江南二月。猶有枝頭千點雪。邀上方樽。却占東君一半春。巨濟曰。樽前眼底南國風光都在此。移過江來。從此江南不復開。乃減字木蘭花調也。

劉叔儻

劉叔凝，名仙倫，廬陵人，號招山。樂章爲人所膾炙。
其賞牡丹，賀新郎，誰把天香和曉露，倩東風特地
勾芳臉。隔花聽取提壺，勸道此花過了春歸，蝶愁
鶯怨，最佳。而結句意俗，秋日念奴嬌云：西風何事
爲行人掃蕩煩襟如洗，垂張蒸瀾都捲盡。一片瀟
湘清泚，酒病驚秋詩愁入鬢，對景人千里。楚宮故
事，一時分付流水。○江上買取扁舟，排雲湧浪，直
過金沙尾，歸去江南丘壑處，不用重尋月姊，風露
一杯深。芙蓉裳冷，笑傲煙霞裡，草廬如舊，臥龍知爲

誰起此首絕佳，又有繫裙腰一辭云。山兒蠹蠹水兒清，船兒似葉兒輕。風兒更沒人情，月兒明，廝合湊送人行。○眼兒簌簌淚兒傾，燈兒更冷清清，遭逢雁兒又沒前程。一聲聲怎生得夢兒成。此詩辭儂薄而意優柔，亦柳永之流也。

洪叔璵

洪叔璵，名茶，自號空同辭客。其瑞鶴仙云：聽梅花吹動涼夜，何其明星有爛相看。淚如霰，問而今去也。何時會面，匆匆聚散，便作秋鴻社燕，最傷心。夜

來枕上斷雲零雨何恨○因念人生萬事回首悲涼都成夢幻芳心繾綣空惆悵巫陽館况船頭一轉三千餘里隱隱高城不見恨無情春水連天片帆似箭詠新月南柯子云柳浪搖晴沼荷風度晚簷碧天如水印新蟾一罅清光斜露玉纖纖○寶鏡微開匣金鉤未押簾西樓今夜有人憚應傍妝臺低照畫眉尖水宿菩薩蠻云斷虹遠飲橫江水萬山紫翠斜陽裏繫馬短亭西丹楓明酒旗○浮生長客路事逐孤鴻去又是月黃昏寒燈人閉門

其餘如笑捐瓊珮遺交甫。肯把文梭擲。幼興花上蝶。水中鳧芳心密意。兩相於用事用韻皆妙。又合數松兒分香柏子。總是牽情處。用唐詩。櫻頭擊鼓轉花枝。席上藏鬪。握松子事也。全篇如月華清水龍吟。蓦山溪齊天樂。皆不減周美成。不盡錄也。

馮偉壽

馮偉壽名文子號雲目辭多自製腔草堂辭選其春風惡劣。把數枝香錦和鶯吹折一首。又春風裊柳。其自度曲也。被梁間雙燕話盡。春愁朝粉謝午

花柔倚紅闌故與蝶園蜂繞柳縣無數飛上搔頭
鳳管聲圓蠶房香暖笑挽羅衫須少留隔院蘭馨
趁風遠鄰牆桃影伴烟收○些子風情未減眉頭
眼尾萬千事欲說還休薔薇刺牡丹毬殷勤記省
前度綢繆夢裡飛紅覺來無覓望中新緣別後空
稠相思難偶歎無情明月今年已見三度如鈎殊
有前宋秦兒風藍比之晚宋酸餡味教督氣不侔
矣餘句如笑呼銀漢入金鯨臨邛高軒菴列爲麗

句圖云

吳夢鈞

吳夢窓，名文英，字君特，四明人。陰君煥序其辭云：求辭於吾宋，前有清真，後有夢鈞，此非煥之言，四海之公言也。其聲聲慢一辭云：檀樂金碧，婀娜蓬萊，遊雲不蘸芳洲，露柳霜蓮，十分點綴殘秋，新彎畫眉，未穩似含羞，低度牆頭愁送遠，駐西臺車馬，共惜臨流。○知道池亭多宴掩庭花，長是驚落秦謳，膩粉闌干，猶聞凭袖香留，輸他翠漣拍甃，瞰新妝，終日凝眸，簾半捲，戴黃花，人在小樓。蓋九日晏。

侯家園作也、

玉樓春

吳夢牕玉樓春云、茸茸狸帽遮梅額。金蟬羅剪胡袖窄、肩輿爭看小腰身。倦態強隨閒鼓笛。○問稱家在城東陌、欲買千金應不惜。歸來困頓滯春眠、猶夢婆娑斜趁拍。深其意態者也。

王實之

王邁字實之、號臞菴、蒲陽人、丁丑第四人及第。劉後村贈之辭云、天壤王郎數人物。方今第一談笑

裡。風霆驚坐。雲煙生筆。落落元龍湖海氣。琅琅董
相天人策。其重之如此。余又見翰苑新書。劉後村
與王實之四六啓云。聲名早著。不數黃香之無雙。
科目小低。猶壓杜牧之第五。元化孕此五百年之
間氣。同輩立于九萬里之下風。又云。朱雲折檻。諸
公慙。請劍之言。楊子哭庭。千載裝裂麻之語。一葉
身輕。何去之勇。六丁力盡而挽不回。有謫仙人駿
馬。名嫗之風。無杜少陵冷炙殘杯之態。麗人歌陶
秀實郵亭之曲。好事繪韓熙載夜宴之圖。擁通德

而著書命，便了以沽酒。云云觀此實之益進，則忠
鯁退，則豪俠元龍太白一流人也，可補史氏之遺。

馬莊父

馬莊父字子嚴，號古洲，建安人。有經學，多論著，填
辭其餘事也。草堂辭選其春遊歸朝懽一首，餘如
月華清云、悵望月中仙桂、問竊藥佳人與誰同歲、
賀聖朝云、遊人拾翠不知遠被子規呼轉、阮郎歸
結句云、三三兩兩叫船兒、人歸春也歸。元夕辭云
玉梅對妝雪柳鬧蛾兒、象生嬌顫可考，見杭都節

物

萬俟雅言

萬俟雅言精於音律，自號辭隱，崇寧中充大晟府製撰，按月用律進辭，故多新聲。草堂選載其三臺及梅花引二首而已。其大聲集多佳者，山谷稱之爲一代辭人。黃玉林云：雅言之辭，發妙音於律呂之中，運巧思於斧鑿之外，蓋辭之聖也。今約載其二篇。昭君怨云：春到南樓雪盡，驚動燈期花信。小雨一畊寒倚闌干。○莫把闌干倚，一望幾重煙水。

何處是京華。暮雲遮。卓牌兒云。東風綠楊天。如畫出清明院宇。玉靨淡泊。梨花帶月。燕支零落。海棠經雨。單衣怯黃昏。人正珠簾笑語。相並戲蹴秋千。共携手。同倚闌干。暗香時度。○翠函繡戶。路繚繞。潛通幽處。斷魂凝佇。嗟不似飛絮。閒悶。閒愁。難消遣。此日年年意緒無據。奈酒醒春去。

黃玉林

黃玉林名昇字叔暘有散花菴人止稱花菴云嘗選唐宋辭名曰絕妙辭選與草堂詩餘相出入今

草堂辭刻本多誤字及失名氏者賴此可證此本世亦罕傳予得錄于王吏部相山子名嘉賓玉林之

辭

玉林之

辭附錄卷尾凡四十首草堂辭選其二南山未解

松梢雪及枕鐵稜稜近五更是也然非其佳者其

月照梨花一首云晝景方永重簾花影好夢猶酣

鶯聲喚醒門外風絮交飛送春歸○脩蛾畫了無

人問幾多別恨淚洗殘粉不知郎馬何處嘶煙草

萋迷鷓鴣啼此首有花間遺意又賀新郎梅辭云

自掃梅花下問稍頭冷蘊疎疎幾時開也間者闋

焉今久矣。多少幽懷欲寫，有誰是孤山流亞。香月
一聯真絕唱，與詩人千載爲嘉話。餘興味付來者。
清癯不戀雕闌榭，待與君白髮相懽。竹籬茅舍，幸
甚今年無酒禁。滔滔小漕壓蔗，已準擬霜天雪夜。
自醉自吟，仍自笑。任解冠落珮，從嘲罵書此意。寄
同社，此辭用文句入音律而不酸宋。辭之體也。其
餘若九日辭、蘭佩秋風冷、茱囊曉露新、秋懷辭、月
印金樞、曉未收、夜涼辭、冰雪襟懷、瑠璃世界、夜氣
清如許、暮春辭、戲臨小草書園、扇自揀、殘花挿淨。

瓶又夜來能有幾多寒。已瘦了梨花一半。贈丁南鄰云。待踞壺食蛤。相期汗漫。與煙霞會。用盧敖事也。見淮南子。

評稼軒辭

廬陵陳子宏云。蔡光工于辭。靖康中。陷虜庭。辛幼安嘗以詩辭謁之。蔡曰。子之詩則未也。他日當以辭名家。故稼軒歸宋。晚年辭筆尤高。嘗作賀新郎。云綠樹聽啼鵝。更那堪杜鵑聲住。鷓鴣聲切。啼到春歸無啼處。苦恨芳菲都歇。筭未抵人間離別。馬

上琵琶開塞黑更長門翠輦辭金闕看燕燕送歸妾○將軍百戰身名裂向河梁回頭萬里故人長絕易水瀟瀟西風冷滿座衣冠似雪正壯士悲歌未徹啼鳥還知如此恨料不啼清淚空啼血誰伴我醉明月此辭盡集許多怨事全與李太白擬恨賦手段相似又止酒沁園春云杯汝前來老子今朝點檢形骸甚長年抱渴咽如焦釜于今喜溢氣似奔雷漫說劉伶古今達者醉後何妨死便埋如此歎汝於知已真少恩哉○更憑歌舞爲媒筭合

作平居鳩毒猜。況怨無大小。生於所愛。物無美惡。過則爲灾。與汝成言。勿畱函去。吾力猶能肆汝杯。杯再拜道塵之卽去。招則須來。此又如賓戲解嘲等作。乃是把作古人手段。寓之於辭賦。築偃湖云。疊嶂西馳。萬馬回旋。衆山欲東。正驚湍直下。跳珠倒濺。小橋橫截。新月初弓。老合投閒。天教多事。檢校長身。十萬松。吾廬小小。在龍蛇影外。風雨聲中。爭先見面。重重看。爽氣朝來三四峰。似謝家子弟衣冠磊落。相如庭戶。車騎從容。我覺其間雄深雅健。

如對文章太史公，新堤路問偃湖何日。煙水濛濛，
且說松而及謝家。相如太史公，自非脫落故常者。
未易闡其堂奧。劉改之所作沁園春，雖頗似其豪，
而未免於粗。近日作辭者，惟說周美成、姜堯章而
以東坡爲詩辭，稼軒爲辭論。此說固當，蓋曲者曲
也。固當以委曲爲體。然徒狃於風情婉變，則亦易
厭。回視稼軒所作，豈非萬古一清風哉？或云周姜
曉音律，自能撰辭調，故人尤服之。

辭品卷之五

成都楊慎升菴著

虞美人草

賈氏談錄云、褒斜谷中、有虞美人草、狀如雞冠花、葉相對、益州草木記云、雅州名山縣、出虞美人草、唱虞美人曲、應拘而舞、酉陽雜俎云、舞草出雅州、益州方物圖贊、虞作娛、唐人舊曲云、帳中草、草軍情變、月下旌旗亂、攬衣推枕愴離情、遠風吹下楚歌聲、正三更、烏鵲欲上、重相顧、豔態花無主、手中

蓮鈎凜秋霜九泉歸去是仙鄉恨茫茫宋玉載萬
和云世間離恨何時了不爲英雄少楚歌聲起霸
圖休野葛荒葵老吳城暮玉貌知何處至今芳草
解婆娑只有當時魂魄未消磨

竝蒂芙蓉辭

宋政和癸巳大晟樂成嘉瑞既生蔡元長以晁端
禮次膺薦於徽宗詔乘驛赴闕次膺至都下會禁
中嘉蓮生異苞合趺冕出天造人意有不能形容
者次膺效樂府體屬辭以進名竝蒂芙蓉上覽之

稱善除大晟樂府協律郎，不克受而卒。其辭云：大
液波澄向檻中照影芙蓉同蒂，千柄綠荷深並丹
臉爭媚。天心眷臨聖日，數字分明敞嘉瑞。弄香喚
蓮，願君王壽與南山齊比。○池邊屢回翠輦，擁羣
仙醉賞，憑闌凝思夢緣攬飛瓊，共波上遊戲西風。
又有露下更結雙雙新蓮子，鬪裝競美，問此央向
誰留意，不惟造語工緻，而曲名亦新，故錄于此。然
大臣謾小臣俟不亡何俟乎。

宋徽宗辭

宋徽宗北隨金虜後見杏花作燕山亭一辭云裁剪冰綃輕疊數重冷淡燕脂注新樣靚妝豔溢香融羞殺蓋珠宮女易得凋零更多少無情風雨愁苦閒院落淒涼幾番春暮○憑寄離恨重重這雙燕何曾會人言語天遙地遠萬水千山知他故宮何處怎不思量除夢裡有時曾去無據和夢也有時不做辭極淒婉亦可憐矣又在北遇清明日詩曰茸母初生認禁煙草名無家對景倍悽然帝城春色誰爲主逢指鄉關涕淚連又戲作小辭云孟

婆孟婆。你做夢方便。吹箇船兒倒轉。孟婆入宋汴京勾闈語謂風也
茸母孟婆。正是的對。

孟婆

俗謂風曰孟婆。蔣捷辭云。春雨如絲繡出花枝紅
裏。怎禁他孟婆合皂。宋徽宗辭云。孟婆好做夢方
便。吹個船阮倒轉。江南七月間有大風甚於舶舶
野人相傳以爲孟婆發怒。按此齊李駒騮聘陳問
陸士秀。江南有孟婆是何神也。士秀曰。山海經帝
之二女遊於江中。出入必以風雨自隨。以帝女故

曰孟婆猶郊祀志以地神爲泰媪此言雖鄙俚亦自有來矣、

憶君王

徽宗被虜北行謝克家作憶君王辭云依依官柳拂宮牆宮殿無人春晝長燕子歸來依舊忙憶君王月照黃昏人斷腸忠憤之氣寓于聲律宜表出之其調卽憶王孫也、

陳敬叟

陳敬叟名以莊號月溪有水龍吟一首自注記錢

塘之恨，蓋謝太后隨北虜去事也。其辭曰：晚來江
闊潮平，越船吳榜催人去。稽山滴翠，胥濤濺恨。
襟離緒，訪柳章臺，問桃仙圃。物華如故，向秋娘渡
口。泰娘橋畔依稀是相逢處。○窈窕青門紫曲，舊
羅衣新番金縷。仙音恍記，輕攏悽撫哀絃。危柱金
屋難成，阿嬌已遠，不堪春暮。聽一聲杜宇，紅殷綠
老。雨花風絮，是時謝太后年七十餘，故有金屋阿
嬌，不堪春暮之句。又以秋娘泰娘比之，蓋惜其不能死，也有愧於荷登之毛氏，竇建德之曹氏多矣。

同時孟鯉有折花怨云。匆匆杯酒又天涯。晴日墻東叫賣花。可惜同生不同死。漫隨春色去。誰家鮑輓亦有詩云。生死雙飛亦可憐。若爲白髮上征船。未應分手江南去。更有春光七十年。噫婦人不足責。誤國至此者秦檜賈似道可勝誅哉。

陳剛中辭

天台陳剛中孚在燕端陽日當母誕作太常引二章云。綵絲堂上簇蘭翹記。生母在今朝。無地捧金焦。柰煙水龍沙路遙。碧天迢遞。白雲何處急雨蕭

蕭萬里夢魂消待飛逐錢塘夜潮其二短衣孤劍客乾坤奈無策報親恩三載隔晨昏更疎雨寒燈斷魂赤城霞外西風鶴髮猶想倚柴門蒲醑漫盈樽倩誰寫青山淚痕時爲編脩云

惜分釵

呂聖求惜分釵一辭云春將半鶯聲亂柳絲拂馬花迎面小堂風暮樓鐘草色連雲暝色連空重重○秋千畔何人見寶釵斜照春妝淺酒霞紅與誰同試問別來近日情悰忡忡此辭妙在促韻

鄒志完陳瑩中辭

復齋澇錄云。鄒志完徒照陳瑩中貶廉間。以長短句相諧。樂有箇。胡兒模樣別。滿領鬚生得渾如漆。見說近來頭也白。髭須鵝得長。長黑逸一句。箇子摘來須有千莖雪。莫向細君容易說。恐他嫌你將伊摘。此瑩中語。謂志完之長鬚也。有箇頭陀脩苦行。頭上頭髮。毬毬身披一幅。黪裙衫。緊纏雙脚苦要遊南聞。說度牒朝夕到。并除領下鬚。髯鉢中無粥住。無菴摩登伽處。只恐却重參。此志完語。謂

瑩中之多慾也。廣陵馬推官往來二公間，亦嘗以詩辭贈之。有才何事老青衫，十載低回北斗南。肯伴生髯千日醉，此心真與古人參。今見故人今幾年，年來風物尚依然。遙知閒望登臨處，極目江湖萬里天。志完語也。一樽薄酒滿酌勸君君舉手，不是朋親誰肯相從寂寥濱。人生似夢夢裡惺惺何處用，醜到休辭醉後全勝未醉時。瑩中語也。初志完自元符間貶新州，徽宗卽位，以中書舍人召，未幾謫零陵別駕，龍水安置，未幾徙昭焉。

辭識

復齋漫錄云、鄧肅謂余曰、宣和五年初復九州、天下共慶、而識者憂之也、都下盛唱小辭曰、喜則喜得入手、愁則愁不長久、懽則懽我兩個廝守、怕則怕人來破鬪、雖三尺之童皆歌之、不知何謂也、七年九州復陷、豈非不長久也、郭藥師契丹之帥也、我用以守疆啓敵國禍者、郭爾非破鬪之驗耶、

無名氏撲蝴蝶辭

苕溪漁隱曰、舊辭高雅、非近世所及、如撲蝴蝶一

辭不知誰作非惟藻麗可喜其腔調亦自婉美辭
云煙條雨葉綠遍江南岸思歸倦客尋芳來較晚
岫邊紅日初斜陌上花飛正滿淒涼數聲羌管怨
時魚鴈斷恨隨去水東流事與行雲共遠羅衾舊
香猶煖

曹元寵辭

苕溪漁隱曰曹元寵本善作辭特以紅窓廻戲辭
盛行於世遂掩其名如望月婆羅門一辭亦豈不

佳辭云。漲雲幕。捲漏聲。不到小簾櫳。銀河淡。掃澄
空皓月當軒高挂。秋入廣寒宮。正金波不動桂影。
朦朧。○佳人未逢歎此夕。與誰同望遠。傷懷對景。
霜滿秋紅。南樓何處。想人在長笛一聲中。凝淚眼
立。盡西風。此辭語病在霜滿秋紅之句。時太早爾。
曾端伯編雅辭。乃以此爲楊如晦作。非也。

王采漁家傲辭

復齊漫錄云。王采輔道觀文韶子也。徽宗朝妾奏
天神降于家。卒以此受禍。人以其父熙河妾殺之。

報爾嘗爲漁家傲辭云日月無根天不老浮生總
被消磨了陌上紅塵常擾擾昏復曉一場大夢誰
先覺○洛水東流山四遶路傍幾個新華表見說
在時官職好爭信道冷煙寒雨埋荒草

洪覺範浪淘沙

冷齋夜話云予畱南昌久而忘歸獨行無侶意緒
蕭然偶登秋屏閣望西山於是浩然有歸志作長
短句寄意其辭曰城裡久偷閒塵涴雲衫此身已
是再眠蠶隔岸有山歸去好萬壑千岩○霜晚更

凭欄滅盡晴嵐。微雲生處是茅菴。試問此生誰作
伴。彌勒同龕。

洪覺範禪師贈女真辭

復齋漫錄云。臨川距城南一里有觀曰魏壇。蓋魏夫人經遊之地。具諸顏魯公之碑。以故諸女真嗣續不絕。然而守戒者鮮矣。陳虛中崇寧間守臨川爲詩曰。夫人在兮若冰雪。夫人去兮仙蹤滅。可惜如今學道人。羅裙帶上同心結。洪覺範嘗以長短句贈一女貞云。十指嫩抽春筍纖纖玉軟紅柔。人

前欲展強矯羞微露雲衣寬袖○寂好洞天春晚
黃庭卷罷清幽凡心無計奈閒愁試撚花枝頻嗅

錢思公辭

侍兒小名錄云錢思公謫漢東日撰玉樓春辭曰
城上風光鶯語亂城下煙波春拍岸綠楊芳草幾
時休淚眼愁腸先已斷○情懷漸變成衰晚彎鏡
朱顏驚暗換徃年多病厭芳樽今日芳樽惟怨淺
每酒闌歌之則泣下後閣有白髮姬乃鄧王謁鬟
驚鴻也遽言先王將薨預戒挽鐸中歌木蘭花引

繩爲送。今相公亦將亡乎？果薨於隨州，鄧王舊曲，亦嘗有帝鄉煙雨鎖春愁。故國山川驚淚眼之句。

劉後村

劉克莊字潛夫，號後村。有後村別調一卷。大抵直致近俗，效稼軒而不及也。夢方孚若沁園春云：何處相逢登寶釵，樓訪銅雀臺，喚厨人斫就東溟鯨鮆，圉人呈罷。西極龍媒天下英雄，使君與操餘子誰堪共酒杯。車千乘載燕南代北劍客奇才，○餘酣畫鼓如雷，誰信被晨雞催喚回。歎年光過盡，功

名未立書生老去機會方來使李將軍遇高皇帝
萬戶侯何足道哉推衣起但淒涼感舊慷慨生哀
舉一以例他辭類是其詠菊念奴嬌後段云當試
銓次羣芳梅花差可伯仲之間爾佛說諸天金色
界未必莊嚴如此尚友靈均定交元亮結好天隨
子離邊坡下一杯聊泛霜盞亦奇甚送陳子華帥
真州云記得太行兵百萬曾人宗爺駕御今把做
握蛇騎虎堪笑書生心膽怯車中閉置如新娘空
日送孤鴻去壯語亦可起懦旅中浪淘沙云紙帳

素屏遮全似僧家無端霜月闖凶紗驚起玉關狂
戌夢幾疊寒笳歲晚客天涯鬍髮蒼華今年衰似去年些詩酒近來都減價孤負梅花見天機餘錦

劉伯寵

劉伯寵名褒一字春卿其辭多俊語元夕云金猊戲掣星橋鎖絳紗萬炬玉梅千朵羯鼓喧空鶯弦沸曉櫻稍微破春日旅况云遺策誰家蕩子唾花何處新妝流紅有恨拾翠無心往事淒涼紅淚不

勝閨怨。白雲應老他鄉。送別云、紅枕臂、香痕未落。
舟橫岸作計匆匆。愁如織、斷腸啼鴟。饒舌訴東風。

劉叔安

劉叔安名鎮號隨如。元夕慶春澤一首入草堂選。
又有阮郎歸云。寒陰漠漠夜來霜。階庭風葉黃。歸
鷗數點帶斜陽。誰家砧杵忙。○燈弄幌。月侵廊。熏
籠添寶香。小屏低枕怯更長。和雲入醉鄉。亦清麗
可誦。其詠茉莉云。月浸闌干天似水。誰伴秋娘窓
戶。評者以爲不言茉莉。而相像可得他花不能承

當也。又春宴云：庭花弄影，一簾香月涓涓，有富貴
蘊籍之味。錢元宵餞春二辭，皆奇。南渡填辭鉅工也。

施乘之

施乘之，號楓溪。野外元夕云：休言冷落山家。山翁本厭絲華。試問蓮燈千炬，何如月上梅花。高情可
想也。

戴石屏

戴石屏，名復，古字式之能詩。江湖四靈之一也。辭
一卷，惟赤壁懷古、滿江紅一首，句有萬炬臨江貌。

虎噪千艘烈炬魚龍舞。幾度東風吹世換。千年往事隨潮去。而全篇不稱。臨江仙一首差可見。予所選百琲明珠。餘無可取者。方虛谷議其胸中無百字成誦書故也。

張宗瑞

張宗瑞鄱陽人。號東澤。辭一卷。名東澤。綺語儂。其辭皆倚舊腔。而別立新名。亦好奇之過也。草堂辭選。其疎簾淡月一篇。卽桂枝香也。予愛其垂楊碧。一篇。卽謁金門。其辭云。花半濕。睡起一窓晴色。千

里江南。空咫尺。醉中歸夢直。○前度蘭舟送客。雙鯉沉。沉消息。樓外垂楊如此碧。問春來幾日。

李公昂

李公昂，名昂，英號文溪，資州磬石人。送太守辭有脚豔陽難駐，一辭得名。然其佳處不在此。文溪全集，予家有之。其蘭陵王一首絕妙，可並秦周。其辭云：燕穿幙。春在深深院落。單衣試龍沫，旋熏又怕東風曉。寒薄別來情緒惡，瘦得腰圍柳弱。清明近，正似海棠怯雨。芳疎任飄泊。○欽留去年約，恨易

老嬌鶯多誤靈鵠碧雲杳杳天涯各望不斷芳草
又迷香絮廻文強寫字屢錯淚欲注還閣孤酌
住春腳便彩局誰懽寶軫慵學階除拾取飛花嚼
是多少春恨等閒吞却猛拍闌干嘆命薄悔舊諾

陸放翁

放翁辭纖麗處似淮海雄慨處似東坡其感舊鵠
橋仙一首華燈縱博雕鞍馳射誰記當年豪舉酒
徒一半取封侯獨去作江邊漁父○輕舟八尺低
蓬三扇占斷蘋洲煙雨鏡湖自屬閒人又何必官

家賜與英氣可掬，流落亦可惜矣。其墜鞭京洛，解珮瀟湘，欲歸時，司空笑問漸近處丞相嗔狂，真不減少游。

張東父

張震字東父，號無隱居士，蜀之遂寧人也。孝宗朝爲諫官，有直聲。孝宗稱其知無不言，言無不當。光宗朝以數直言去位，時稱王十朋去省爲之空。張震去臺爲之空一代名臣也。而其辭婉媚風流，乃知賦梅花者，不獨宋廣平也。其葛山溪青梅如豆。

一首草堂入選而失其名氏

天風海濤

趙汝愚題鼓山寺云幾年奔走厭塵埃此日登臨亦快哉江月不隨流水去天風常送海濤來朱晦翁摘詩中天風海濤字題扁人不知其爲趙公詩也嚴次山有水龍吟題於壁云飈車飛上蓬萊不須更跨琴高鯉割然長嘯天風湧洞雲濤無際我欲乘桴從茲浮海約任翁起辨虹竿千丈轄釣五十艱點對連鰲餌誰榜佳名空翠紫陽仙去騎

箕尾銀鈎鐵畫龍掣鳳翥，留人間世更憶東山一
曲霑襟淚到而今幸有高庭遺愛寓甘棠。意此辭
前段言江山景，後段紫陽仙去指朱文公，東山甘
棠指趙公也。趙詩朱字嚴辭可謂三絕特記于此。

劉篁嶧

劉坊父字子寰號篁嶧早登朱文公之門居麻沙
有文集行世其玉樓春云今來古往長安道歲歲
榮枯原上草行人幾度到江濱不覺身隨楓樹老
○浦花易晚蘆花早客裏光陰如過鳥一般垂柳

短長亭去路。不如歸路好。頗有警悟。觀泉二句云。
靜坐時看松鼠飲。醉眠不礙山禽浴。亦新。

劉德脩

劉光祖字德脩號後溪蜀之簡州人有鶴林文集
小辭附焉其醉落魄云春風開者一時還共春風
謝柳條送我今槐夏不飲香醪孤負人生也○曲
塘泉細幽琴寫胡牀滑簾應無價日遲睡起簾鈎
挂何不歸與花竹秀而野

潘庭堅

潘昉、字庭堅、號紫巖、乙未何槩榜及第、第三人、美姿容、時有該云、狀元真何郎、榜眼真郭郎、探花真潘郎也、庭堅以氣節聞於時、辭止南鄉子一首、草堂所選是也、首句生怕倚闌干、今本生誤作伐、

魏了翁

魏了翁、字華父、號鶴山、邛州人、慶元己未第二人及第、與真西山齊名、道學宗派、辭不作艷語、長短句一卷、皆壽辭也、昔薩蠻壽范靖倅云、東窓五老峰前月、南窓九疊坡前雪、推出侍郎山、着君函戶

間。○離騷鄉裡住，怯記庚寅度。挹取芷蘭芳，酌君千歲觴。又鵝鴨天壽范靖州云：誰把璇璣運化工。
參旗又挂玉梅東。三三律管聲餘亥，九九玄經卦起申。又水調換頭云：玉圍腰金繫肘，繡籠鞍。宋代壽辭，無有過之者。

吳毅甫

吳毅甫，名潛，號履齋，嘉定丁丑狀元。爲賈以道所陷，南遷，有履齋詩餘行世。有送李御帶祺一辭，報國無門空自怨，濟時有策從誰吐，亦自道也。李祺

號竹湖亦當時名士所著有春秋王霸列國分紀予得之於市肆故書中乃爲傳之亦奇事也并附見此

履齋贈妓辭

吳履齋有贈建寧妓女賀新郎辭集中不載見於小說今錄于此可意人如玉小簾櫳輕匀淡佇道家粧束長恨春歸無尋處全在波明黛綠看冶葉倡條渾俗比似江梅清有韻更臨風對月斜依竹看不足詠不足○曲屏半掩春山簇正輕寒夜永

花睡半欹殘燭縹緲九霞光裡夢香在衣裳臘馥
又只恐銅壺聲促試問送人歸去後對一奩花影
垂金粟腸已斷恨難續

向豐之

向豐之號樂齋有如夢令一辭云誰伴明窓獨坐
我和影兒兩個燈盡欲眠時影也把人拋躲無那
無那好箇恓惶的我辭似俚而意深亦佳作也

毛开

毛升小辭一卷惟予家有之其滿江紅云瀲火初

收秋千外輕煙漠漠春漸遠綠楊芳草燕飛池閣
已昔單衣寒食後夜來還是東風惡對空山寂寥
杜鵑啼梨花落○傷別恨閒情作十載事驚如昨
向花前月下共誰行樂飛蓋低迷南苑路前裙長
望東城約但老來憔悴惜春心年年覺此作亦佳
聊記于此

蓦山溪

葛魯卿有蓦山溪一曲詠天穿節郊射也宋以前
以正月二十三日爲天穿節相傳云女媧氏以是

日補天俗以煎餅置屋上名曰補天穿今其俗廢
久矣辭云春風野外卯色天如水魚戲舞綃紋似
出聽新聲北里追風駿足千騎卷高門一箭過萬
人呼鴈落寒空裡○天穿過了此日名穿地橫石
俯清波競追隨新年樂事誰憐老子使得縱遨遊
爭捧手乍憑肩夾路遊人醉辭不甚工而事奇故
拈出之卯色天用唐詩殘霞感水魚鱗浪薄日烘
雲卯色天之句東坡詩亦云笑把鴟夷一樽酒相
逢卯色五湖天今刻蘇詩不知出處改卯色爲柳

色非也。花間辭。一方卯色。楚南天。注以卯爲源。亦非。

張卽之書莫峯辭

聽春教燕鶯。鶯訴朝朝花困。風雨六橋忘却清明後。碧盡柳絲千縷。蜂蝶侶。正閒覓。閒花閒草閒歌舞。最憐西子。尚薄薄雲情。盈盈波淚點點舊眉嫵。○流紅記空泛秋宮怨句。才色何處嬌妬。落紅無限隨風絮。詩恨有誰曾遇。堪恨處。恨前度花信催花去。東君暗苦。更多囑。多情多愁杜宇。多訴斷腸。

語○此宋人莫峯之辭。張卽之書。孫生顯。祖家藏。
墨跡如新。而字極恠。錄其辭於此。卽之號樗寥。莫
峯號若山。

寫辭述懷

扶風馬大夫作辭述懷聲寄滿庭芳云。雲點疎鬢。
霜侵衰鬢。去年猶勝今年。一迴老矣。堪歎又堪憐。
思昔青春美景。無非是月下花前。誰知道金章紫
綬。多少事憂煎。○侵晨騎馬出。風初暴。橫雨又淒
然。想山翁野叟正爾高眠。更有紅塵赤日。也不到

松下林邊如何好。吳淞江上閒了釣魚船。大夫名
晉字孟昭。嘗爲官任。

岳珂祝英臺辭

岳珂北固亭祝英臺近填辭云。澹煙橫層霧歛勝
槩分雄占。月下鳴榔。風急怒濤。蹙開河無限清愁。
不堪臨檻。正雙鬢秋風塵染。○湧登覽。極目萬里
沙塲。事業頻看劍。古往今來。南北限天塹。倚樓誰
弄新聲。重城正掩。歷歷數西州。更點此辭。感慨忠
憤。與辛幼安千古江山一辭相伯仲。

蘇雪坡贈楊直夫辭

蘇雪坡贈楊直夫名棟青神人辭云允文事業從容了要岷峨人物後先相照見說君王曾有問似此人才多少況蜀珍先已登廊廟但側耳聽新詔按小說高宗曾問馬騏曰蜀中人才如虞允文者有幾騏對曰未試焉知允文亦試而後知也蘇與楊馬皆蜀人楊在眉山爲甲族直夫之妹通經學比於曹大家嫁虞氏生虞集爲鉅儒其學無師傳于母氏也此事蜀人亦罕知故著之○馬騏南部

人涓之孫。

慶樂園辭

慶樂園韓偓胄之南園也。張叔夏著高陽臺辭云。
古木迷雅虛堂起。燕歡遊轉眼驚心。南圃東窓酸
風掃盡芳塵。鬢貂飛入平原草。最可憐渾是秋陰
夜沉沉。不信歸魂不到花深。○吹簫踏葉幽尋去
任船依斷石。袖裹寒雲老桂懸香珊瑚碎擊無音
故園已是愁如許。撫殘碑又却傷今。更關情秋水
人家斜照西林。

詠雲辭譏史彌遠

彌遠之比周于楊后也，出入宮禁，外議甚譁。有人作詠雲辭譏之云：「往來與月爲儕，舒卷和天也。蔽宋人言其本朝家法最正，母后寢賢，至楊后蕩然矣。」

趙從橐壽賈似道陂塘柳

趙從橐坡塘柳云：指庭前翠雲金雨霏霏，香滿仙宇。一清透徹，渾無底。秋水也無流處。君試數此樣襟懷，頓得乾坤住。閒情半許，聽萬物氤氳。從來形

色每向靜中覩。○琪花路相接西池壽母。年年弦月時序。荷衣菊佩尋常事。分付兩山容與天證取此老平生可向青天語。瑤卮緩舉要見我何心西湖萬頃來去自鷗鷺。

賈似道壁辭

似道遭貶時人題壁云去年秋今年秋湖上人家樂復憂西湖依舊流。○吳循州賈循州十五年間一轉頭人生放下休此語視雷州寇司戶之句尤警吳循州謂履齋之貶乃賈擠之也。

劉須溪

須溪劉辰翁元宵雨辭云角動寒譙看雨中燈市。
寒意蕭蕭星毬明戲馬歌管雜鳴刁泥沒膝舞停
腰。談蠅任風飄更可憐紅啼桃臉綠額楊橋○當
年樂事朝朝曾錦鞍呼妓金屋藏嬌圍香春醉酒。
坐月夜吹簫今老去倦歌謠嫌殺杜家喬漫三杯
擁爐覓句斷送春宵以意難忘按之可歌也

詹天游

詹天游以豔辭得名見諸小說其送童龜天兵後

歸杭齊天樂云。相逢喚醒京華夢。吳塵暗斑吟牋。
倚擔評花認旗沽酒。歷歷行歌奇跡。吹香弄碧。有
坡柳風情。逋梅月色。畫鼓江船。滿湖春水。斷橋客
○當時何恨惟侶。甚花天月地。人被雲隔却載蒼
煙招白鷺。一醉修江又別。今回記得。再折柳穿魚。
賞梅催雪。如此湖山。恐教人更說。此伯顏破杭州
之後也。觀其辭全無黍離之感。桑梓之悲。而止以
遊樂言。宋末之習。上下如此。其亡不亦宜乎。童雍
天失其名氏。有龐天脞語。一卷傳于今。云天游。又

有清平調云醉紅宿翠誓驛烏雲陞管是夜來不
睡郵更今朝早起○東風滿捐腰支階前小立多
時恰恨一番新雨想應溼透鞋兒蓋詠妓訴狀立
廳下也、又見石次仲集

鄧千江

金人樂府稱鄧千江望海潮爲第一其辭云雲雷
天塹金湯地險名藩自古臯蘭營屯繡錯山形米
聚縣襟百二秦關鏖戰血猶殷見陣雲令落時有
鶻盤靜塞樓頭晚月依舊玉弓彎○看看定遠西

還有元戎閩令上將齋壇區脫晝空兜零夕舉甘
泉又報平安吹笛虎牙間且宴陪珠履歌按雲鬟
來招英靈醉魄長繞賀蘭山此辭全步驟沈公述
上王君貺一首今錄于此山光凝翠川容如畫名
都自古并州簫鼓沸天弓刀似水連營百萬貔貅
金騎走長楸少年人一一錦帶吳鈎路入榆關鴈
飛汾水正宜秋○近思昔日風流有儒將醉吟才
子狂遊松偃舊亭城高故國空留舞榭歌樓方面
倚賢侯便恐爲霖去難留好向恣攜弦管宴蘭舟

然千江之辭，鱗鈞雄壯，何啻十倍過之，不止出藍而已。

王予可

王予可金明昌時人。或傳其仙去，事不可知。其生
於子云，夜色明河淨，好風來千里。水殿謫仙人，皓
齒清歌起。○前聲金筰中，後聲銀河底。一夜嶺頭
雲繞遍，樓前水辭之。飄逸高妙如此，固謫仙之流
亞也。

滕玉霄

元人工于小令套數，而宋辭又微。惟滕玉霄集中填辭不減宋人之工。今略記其百字令一首云：柳
顰花困把人間思怨樽前傾盡何處飛來雙比翼。
直是同聲相應寒玉嘶風香雲捲雪一串驪珠引。
阮郎去後有誰著意題品○誰料濁羽清商絃弦急管猶自餘風韻莫是紫鸞天上曲兩兩玉童相
並白髮梨園青衿老傳試與留連聽可人何處滿
庭霜月清冷玉宵又有贈歌童阿珍瑞鵝鵠云分
桃斷袖絕嫌猜翠被紅裙興不乖洛浦乍陽新燕

爾巫山行雨左風懷。○手攜裏野便娟合背抱齊宮婉變懷玉樹庭花千載曲隔江唱罷月籠階益鄭櫻桃解紅兒之流也用事甚工予同年吳學士仁甫喜誦之

牧菴辭

姚牧菴醉高歌辭云十年燕月歌聲幾點吳霜鬢影西風吹起鱸魚興已在桑榆暮景○榮枯枕上三更傀儡場中四并人生幻化如泡影幾個臨危自省○牧菴一代文章巨公此辭高古不減東坡

稼軒也。

元將填辭

元將紇石烈子仁上平南辭云，蟲鋒搖，螳臂振舊
盟寒恃洞庭彭蠡狂瀾天兵小試萬蹄一飲楚江
乾，捷書飛上九重天春滿長安。○舜山川周禮樂
唐日月漢衣冠洗五州妖氣關山已平全蜀風行
何用一泥丸有人傳喜日邊都護先還此亦黠虜
也天欲戕我中國人乃生此種反指中國爲妖氣
耶非我

皇明一汎掃之天柱折而地維陷矣

江西烈女辭

戴石屏薄遊江西有富翁以女妻之留三年思歸自言曾娶婦翁怒女宛曲解之盡以嫁奩贈行仍餞以辭自投江而死其辭曰惜多才憐薄命無計可留汝採碎花牋忍寫斷腸句道傍楊柳依依千絲萬縷抵不住一分愁緒捉月盟言不是夢中語後回君若重來不相忘處把杯酒澆奴墳上土嗚呼女則烈矣戴尚得爲人類也乎世俗有謠辭云

孫飛虎好色柳盜跖貪財這賊牛兩般都愛石屏
之謂與出桂苑叢談馮翊子伏著

辭品卷之五終

辭品卷之六

成都楊慎升菴著

八詠樓

沈休文八詠詩語麗而思深後人遂以名樓照映千古近時趙子昂鮮于伯機詩辭頗勝趙詩云山城秋色靜朝暉極目登臨未擬歸羽士曾聞遼鶴語征人又見塞鴻飛西流二水玻黎合南去千峰紫翠圍如此溪山良不惡休文何事不勝衣鮮于百字令云長溪西注似延平雙劍千年初合溪上

千峰明紫翠，放出羣龍頭。角瀟灑雲林，微茫煙草。
極目春州闊，城高樓迥。恍然身在寥廓。○我來陰雨兼旬，灘聲怒。
日日東風惡，須待青天明月夜。一試嚴維佳作。風景不殊，溪山信美。
處處堪行樂，休文何年。年多病如削。二作結句略同，稍含微意。不專爲詠景發，子故取而著之。

杜伯高三辭

杜旛字伯高，蘭亭詩爲世所稱，樂府亦佳。醉江月賦石頭城云：江山如此是天開。萬古東南王氣，一

自髯孫橫短策。坐使英雄鶻起。玉樹聲消。金蓮影
散。多少傷心事。千年遼鶴併。疑城郭非是。○當日
萬駟雲屯。潮生潮落處。石頭孤峙。人笑褚淵今齒
冷。只有袁公不死。斜日荒煙。神州何在。欲墮新亭
淚。元龍老矣。世間何恨餘子。摸魚兒。湖上賦云。放
扁舟。萬山環處。平鋪碧浪千頃。仙人憐我征塵久。
借與夢遊清枕。風乍靜。望兩岸羣峰倒浸玻瓈影。
樓臺相暎。更日薄煙輕。荷花似醉飛。鳥墮寒鏡。○
中都內羅綺。千街萬井。天教此地幽勝。仇池仙伯

今何在。隄柳幾眠還醒。君試問此意。只今更有誰人領。功名未竟。待學取鷗夷。仍携西子。來動五湖興。驀山溪賦春云。春風如客。可是繁華主。紅紫未全開。早綠遍江南千樹。一番新火。多少倦遊人。纖腰柳。不知愁。猶作風前舞。○小闌干外。兩兩幽禽語。問我不歸家。有佳人天寒日暮。老來心。事只有春知。江頭路。帶春來。更帶春歸去。

徐一初登高辭

徐一初登高摸魚兒辭。對采蘋。一年一度龍山今

在何處。參軍莫道無勲業。消得從容尊俎。君看取
便破帽飄零也。傳名千古。當年幕府。知多少時流
等閒收拾。有箇客如許。○追往事。滿目山河晉土。
征鴻又過邊羽。登臨莫苦高層望。怕見故宮禾黍。
觴綠醑澆萬斛牢愁。汨汨閣新亭雨。黃花無語。畢竟
是西風披拂。猶識舊時主。亦感慨之作也。

南澗辭

韓南澗題采石蛾眉亭辭云。倚天絕壁直下江千
尺。天際兩蛾橫黛。愁與恨。幾時極。○暮潮風正急。

酒闌聞塞笛，試問謫仙何處。青山外，遠煙碧。此霜天曉角調也，未有能繼之者。

高竹屋蘪堤芙蓉辭

高竹屋詠蘇堤芙蓉菩薩蠻辭。紅雲半壓秋波急，
豔妝泣露啼嬌色。幽夢入仙城，風流石曼卿。
○官袍呼醉醒，休捲西風錦。明日粉香殘，六橋煙水寒。
念奴嬌祝英臺近

德祐乙亥太學生作念奴嬌云：半堤花雨對芳辰，
消遣無奈情緒。春色尚堪描畫，在萬紫千紅塵土。

鶻促歸期。鶯收僕舌。燕作留人語。遼闊紅藥韶華
留此孤主。○真箇恨東風。幾番過了。不似今番苦。
樂事賞心磨滅盡。忽見飛書傳羽。湖水湖煙。峰南
峰北。總是堪傷處。新塘楊柳。小橋猶自歌舞。又祝
英臺近云。倚危欄斜日暮。驀驀甚情緒。稀柳嬌黃
全未禁。風雨春江萬里雲濤。扁舟飛渡。那更寒鴻
無數。○嘆離阻。有恨落天涯。誰念孤旅。滿目風塵
冉冉如飛霧。是何人惹愁來。那人何處。怎知道愁
來又去。

文山和王昭儀滿江紅辭

王昭儀之辭傳播中原，文天祥讀至末句嘆曰：惜也！夫人于此少商量矣。爲之代作一篇云：試問琵琶胡沙外，怎生風色寂苦？是姚黃一朶移根仙闕，王母懽闌瓈宴罷。仙人淚滿金盤側，聽行宮半夜雨淋鈴，聲聲歇。○彩雲散，香塵滅，銅驅恨，那堪說。想男兒慷慨，嚼穿齦血。回首昭陽離落日，傷心銅雀迎新月，筭妾身不願似天家。金甌缺，又和云燕子樓中。又推過幾番，秋色相思處，青年如夢，乘鸞

仙闕肌玉暗銷衣帶緩淚珠斜透花鋗側最無端
蕉影上窓紗青燈歇○曲池合高臺滅人間事何堪說向南陽阡上滿襟清血世態便如翻覆雨妾身元是分明月唉樂昌一段好風流菱花缺

附王昭儀辭

太液芙蓉渾不似舊時顏色曾記得恩承雨露玉樓金闕名播蘭簪妃后裡暈潮蓮臉君王側急一朝鼙鼓揭天來縵華歇○龍虎散風雲滅千古恨憑誰說對山河百二泪霑襟血驛館夜驚塵土夢

官車晚碾關山月。願嫦娥相顧肯相容。隨圓缺。

徐君寶妻辭

岳州徐君寶妻某氏被虜來杭居韓蘄王府自岳至杭相從數千里其主者數欲犯之而終以巧計脫蓋某氏有令姿主者弗忍殺之也一日主者怒甚將卽強焉因告曰俟妾祭謝先夫然後乃爲君婦不遲也君笑怒爲主者喜諾某氏乃焚香再拜默祝南向飲泣題滿庭芳辭一闋于壁上書已投大池中以死辭云漢上鱣華江南人物尚遺宣政

風流綠窓朱戶。十里爛銀鈎。一旦刀兵齊舉。旌旗擁百萬貔貅。長驅入。歌樓舞榭。風捲落花愁。○清平三百載。典章文物。掃地都休。幸此身未北。猶客南州。破鑑徐郎。何在空惆悵。相見無由。從今後。斷魂千里。夜夜岳陽樓。

傅按察鴨頭綠

元時有傅按察者。嘗作鴨頭綠一辭。悼宋云靜中看記。昔日淮山隱隱。宛若虎踞龍盤。下樊襄指揮湘漢。鞭雲騎。圍繞三千。勢不成三。時當混一。過唐

之數不爲難。陳橋驛。孤兒寡婦。久假當還。○桂征帆。龍舟催發。紫宸初卷朝班。禁庭空。土花暈碧。輦路悄。訶喝聲乾。縱餘得西湖風景。花柳亦凋殘。去國三千。游仙一夢。依然天淡夕陽間。昨宵也。一輪明月。還照臨安。

楊復初南山辭

楊復初築室南山。以村居爲號。凌彥翀以漁家傲辭壽之云。采芝步入南山道。山深宛似蓬萊島。聞說村居詩思好。還被惱。蒼苔滿地無人掃。○戴酒

亭前松合抱客來便許同傾倒玉兔已將靈藥搗
秋意早月華長似人難老復初和辭云當時承望
求仙道那知薄命如郊島留得殘生猶自好多懊
惱塵緣俗慮何時掃○子已成童無用抱醉眠任
使和衣倒今歲砧聲秋未搗涼氣早看來只恐中
年老瞿宗吉和辭云喜來不涉邯鄲道愁來不竄
沙門島惟有村居閒最好無事惱苔階竹徑頻頻
歸有酒可斟琴可抱長年擬看三松倒自內靈
砂覩自鴻歸隱早朝廷未放玄真老宗吉既和此

辭而復序云。舊譜皆以仄聲起。歐公呼范文正爲窮塞主。首句所謂塞上秋來者。正此格也。他如王荆公之平岸小橋千嶂抱。周清真之幾日春陰寒惻惻。謝無逸之秋水無痕清見底。張仲宗之鈎笠披雲青嶂遙。亦皆如是。今二公皆以平聲易之。特著此以俟知音爾。

凌彥翀無俗念

凌彥翀作無俗念。辭云等閒屈指筭。今來古往誰爲英傑。耳目聰明天賦予。怎肯虛生滅。去燕來鴻。

飛鳥走兔。世事何時歇。風波境界。大川不用頻涉。
○空踏遍萬戶千門。五湖四海。一樣中秋月。正面
相看君記取。全體本來無缺。空裡非空。夢中是夢。
莫向癡人說。須騎鶴夜深朝禮金闕。又蝶戀花辭
云。一色杏花三百樹。茆屋無多。更在花深處。旋壓
小槽留客住。舉杯忽聽黃鸝語。○醉眼看花花亦
舞。風妬殘紅。飛過鄰牆去。恰似牧童遙指處。清明
時節紛紛雨。辭格清逸。一洗鉛華。非駢金儼玉者
比也。

瞿宗吉西湖秋泛

宗吉西湖秋泛。滿庭芳辭。露華催黃。煙蒲駐綠。水光山色相連。紅衣落盡。辜負採蓮船。點檢六橋楊柳。但幾箇抱葉殘蟬。秋容晚。雲寒鴈背。風冷鶯鶯肩。○華筵容易散。愁添酒量。病減詩顛。况情懷冲澹。漸入中年。掃退舞裙歌扇。盡付與一枕高眠。清閒好。晚巾露髮。仰面看青天。又西湖四時望江南。辭西湖景。春日最宜晴。花底管弦公子宴。水邊羅綺麗人行。十里按歌聲。○西湖景夏日正堪遊。全

勒馬嘶垂柳岸紅妝人泛採蓮舟驚起水中鷗○
西湖景秋日更宜觀桂子岡巒金粟富芙蓉洲渚
絲雲閒爽氣滿山前○西湖景冬日轉清奇賞雪
樓臺評酒價觀梅園圃訂春期共醉太平時

瞿宗吉鞋盃辭

楊廉夫嘗訪瞿士衡以鞋盃行酒命其姪孫宗吉
詠之宗吉作沁園春以呈廉夫大喜卽命侍妓歌
以侑觴辭云一掬嬌春弓樣新裁蓮步未移笑靉
生量窄愛渠儘小主人情重酌我休遲醞釀朝雲

斟量暮雨能使麏生風味奇。何須去向花塵留蹟。
月地偷期。○風流到處便宜。便豪吸雄吞。不用隣
任凌波南浦。惟誇羅襪賞花上苑。祇勸金卮羅帕
高擎。銀瓶低注。絕勝翠裙深掩時。華筵散柰此心
先醉。此恨誰知。

馬浩瀾著花影集

馬浩瀾著花影集自序云。予始學爲南辭。漫不知
其要領。偶閱吹劍錄中載東坡在玉堂日有幕士
善歌。坡問曰。吾辭何如。柳耆卿對曰。柳郎中辭宜

十七八女孩兒，按紅牙拍，歌楊柳岸曉風殘月，學士辭須關西大漢，執鐵板，唱大江東去，緣是求二公辭而讀之，下筆略知蹊逕，然四十餘年，僅得百篇，亦不可謂不難矣。法雲道人嘗勸山谷勿作小辭，山谷云：空中語爾。予欲以空中語名其集，或曰不文，改稱花影集。花影者，月下燈前，無中生有，以爲假則真，謂爲實猶涉虛也。今漫摘數首，以便展玩，云：其商調少年遊云，弄粉調脂梳雲掠月。次第曉妝成，鸚鵡籠邊，鞦韆牆裏，半晌不聞聲。○元來

却在瑤階下。獨自踏花行。笑摘朱櫻微。揜翠袖。枝上打流鶯。行香子。云紅遍。櫻桃綠暗芭蕉。項窓深。春思無聊。雙飛燕。懶。百囀鶯嬌。正漏聲遲。簾影靜。篆香飄。○惜月前宵。病酒今朝有誰知。臂玉微銷。封題錦字。寄與蘭翹。恨樹重重。雲渺渺。水迢迢。春夜生。查子。云燒罷。夜香時。獨立簾兒下。真個可憐。宵一刻千金價。○啼痕不記行。暗滿鮫鰣帕蝶宿。牡丹叢。月轉軟轆架。春日海棠春。云越羅衣簿。輕寒透。正畫閣風簾飄繡。無語小鶯慵。有恨垂楊瘦。

○桃花人面應依舊憶。那日擎漿時候，添得暮愁牽。只爲秋波溜。鳳凰臺上憶吹簫。云淡淡，秋容澄。夜景娟娟月挂梧桐。愛簫聲縹緲，簾影玲瓏。彩鳳銜書未至，玉宇靜，香霧空濛。涼如水，翠苔凝露，共樹吟風。○匆匆年華暗換，嗟舊懽成夢。芳鬢飛蓬，想清江泛鷁。紫陌遊驄，應念佳期虛負。瞻素彩，感慨相同。凝情人誰家搗衣砧杵丁東。青玉案云：平川渺渺花無數，明鏡裡孤舟度。花下美人和笑，顧問郎莫似乞漿崔護別。久來何暮。○盈盈羅襪。

凌波步眉月連娟。髻如雲人世光陰花上露。勸郎休去再來須誤個是桃源路。中秋鵲橋仙。云不寒不暑無風無雨。秋色平分佳節。桂花香散夜涼生小樓上簾兒高揭。○多愁多病。閒憂閒悶綠鬢紛紛成雪。平生不作負恩人。惟負了今宵明月。九日金菊對芙蓉。云過鴈行低。鳴蟹韻急。紛紛葉下亭皋。向霜庭看菊。飈館題糕。依然賓主東南美。勝龍山迢遞登高。繡屏孔雀。金橙螃蟹。銀甕葡萄。○痛飲鯨卷波濤。笑百年春夢。萬事秋毫。問臺前戲馬。

海上連鼈。當時二子今安在。乾坤大容我簾毫。四
絃裂帛。雙鬟舞雪。左手持螯。梅花東風第一枝。云
餌玉餐香。夢雲情月。花中無此清瑩。儼然姑射仙
人。華珮明璫。新整五銖衣薄。應怯瑤臺淒冷。自驂
鸞來下。人間幾度。雪深煙暝。○孤絕處。江波流影。
顚領也。春風銷粉。相思千種。閒愁聲聲。禽啼醒西
湖東閣。休說當時風景。但留取一點芳心。他日調
羹金鼎。落花滿庭芳云。春老園林。雨餘庭院。偏惹
蝶駭鶯猜。薦紅皺白。狼藉滿蒼苔。正是愁腸欲斷。

朱箔外點點飄來。分明似身輕飛燕。扶下避風臺。
○當初珍重意金錢競買玉砌新裁更翠屏遮護
羯鼓催開誰道天機繡錦都化作紫陌塵埃。紗窓
裡有人憐惜無語托香腮。

馬浩瀾辭

馬浩瀾洪仁和人號鶴窓善詩詠而辭調尤工皓
首韋布而含吐珠玉錦繡胸腸褒然若貴介王孫
也嘗題許應和松竹雙清扇景辭云剪蒿菜曾將
雙翠親裁旋添成園林佳勝依稀解谷徂徠鳳飛

過文章燦爛蛟騰攫鱗甲鼈懶判節題詩收花釀
酒鬢枯香粉袖粘苔無人識棟梁之具管籥之才。
蔭亭臺儘多風月清無半點塵埃。○竿期截六鼈
連舉巢堪托孤鶴時來色瑩琅玕脂凝琥珀笑他
門柳與庭槐蕭郎去畢宏已老誰富寫生才。君看
取歲寒三友只欠梅開蓋多麗辭也許東溟以爲
可追蹤康伯可可謂信然又題梅花江城引云雪
晴閒覽瘦筇扶過西湖訪林逋湖上天寒草樹盡
凋枯忽見瓊葩光照眼仙格調玉肌膚。○夜空雲

靜月輪孤巧相摹。海濤圖時聽枝頭喟。嘶翠禽呼。
縱有明珠三百琲。知似得此花無清氣。逸發瑩無塵。
想又題許東溟小景昭君怨。云路遠。危峰斜照。
瘦馬塵風衣帽此去向蕭關。向長安。○便坐紫微
花底只似黃糧夢裡三徑易生苔。早歸來。言有盡。
而意無窮。方是作者徐伯齡言鶴牕與陸清溪偕
出菊莊之門而清溪得詩律鶴牕得辭調異體齊
名可謂盛矣。

馬浩瀾念奴嬌

馬浩瀾念奴嬌辭。東風輕軟。把綠波吹作縠紋微
皺。彩舫亭亭寬似屋。載得玉壺芳酒。勝景天開。佳
朋雲集。樂繼蘭亭後。珍禽兩兩驚飛。猶自回首。○
學士港口桃花南屏松色蘇。小門前柳冷翠柔金
紅綺帳掩映水明山秀。閒試評量。總宜圖畫。無此
丹青手。歸時侵夜香街華月如晝。

聶大年辭附馬浩瀾和

聶大年嘗賦卜算子二首蓋自况也。辭云。楊柳小
蠻腰。慣逐東風舞。學得琵琶出教坊。不是商人婦

○忙整玉搔頭。春笋纖纖露。老却江南杜牧之。懶爲秋娘賦。粉淚溼鮫綃。只恐郎情薄。夢到巫山第
幾峰。酒醒燈花落。○數日尚春寒。未把羅衣著。眉黛含顰爲阿誰。但悔從前錯。馬浩闊和云歌得雪
兒歌舞得霓裳舞。料想前身跨鳳仙。合作蕭郎婦。
○顏色雪中梅。淚點花稍露。雲雨巫山十二峰。未
數高唐賦。花壓鬢雲低。風透羅衫薄。殘夢背騰下
翠樓。不覺金釵落。○幾許別離愁。猶自思量著。欲
寄蕭郎一紙書。又怕歸鴻錯。

一枝春守歲辭

守歲之辭雖多，極難其選。獨楊守齋一枝春最爲近世所稱。辭云：竹爆驚春競喧闐，夜起千門簫鼓。流蘇帳暖翠鼎緩騰香霧，停盃未舉奈剛要送年新句。應自賞歌清字圓，未誇上林鶯語。○從他歲窮日暮，縱間愁怎減劉郎風度。屠蘇辨了，迤邐柳忻梅妬。宮壺未晚，早騎馬繡車盈路。還又把月夕花朝，自今細數。

鬪草辭

春日婦女喜爲鬪草之戲。黃子常綺羅香辭云。絹帕藏春。羅裙點露。相約鶯花叢裡。翠袖拈芳。香沁筍芽纖指偷摘。遍綠逕煙霏。悄攀下畫闌。紅紫掃花階。褥展芙蓉。瑤臺十二降仙子。○芳園清晝乍永。亭上吟吟笑語。妬穠誇麗。奪取籌多。贏得玉瑣瑜珥。凝素靨香。粉添嬌。映黛眉淡。黃生喜。綰胸帶空。繫宜男。情郎歸也未。

賣花聲

黃子常賣花聲辭云。人過天街曉色擔頭紅紫滿

筠筐。浮花浪蕊。畫樓睡醒。正眼橫秋水。聽新腔。一
回催起。○吟紅呌白。報得蜂兒知未。隔東西餘音。
軟美。迎門爭買。早斜簪雲髻。助春嬌。粉香簾底。喬
夢符。和辭云。侵曉園丁。叫道嫩紅嬌紫。巧工夫。攢
枝餌。行歌佇立。酒洗粧。新水捲香風。看街簾起。
○深深巷陌。有箇重門開未。忽驚他。尋春夢美。穿
牕透閣。便憑伊喚取。惜花人在誰根底。

梁貢父木蘭花慢

梁貢父。曾燕京人。大德初。爲杭州路總管。政事文

學皆有可觀。嘗作西湖送春。木蘭花慢辭云。問花。
花不語。爲誰落。爲誰開。筭春色三分。半隨流水。半
入塵埃。人生能幾歡笑。但相逢樽酒。莫相推。千古
幕天席地。一春翠繞珠圍。○彩雲回首。暗高臺。煙
樹渺吟懷。拚一醉。留春不住。醉裡春歸。西樓
半簾斜日。惟嚦春燕子却飛來。一枕青樓好夢。又
教風雨驚回。此辭格調俊雅。不讓宋人也。

花倫太史辭

杭州花倫年十八黃觀榜及第三人初讀卷官進

卷以花倫第一、練子寧第二、黃觀第三、御筆改定
以黃第一、練第二、花第三、南京諺有花練黃、黃練
花之語、故後人猶以花狀元稱之、其題科名記及
登科錄、皆以黃練二公死革除之難割毀故相傳
多誤、花有辭藻其後謫戍雲南有題楊太真壽圖
水仙子一闋云海棠風梧桐月荔枝塵覓裳舞翠
盤嬌繡嶺春錦裯嬉金釵信香囊恨痴三郎泥太
真馬嵬坡血污遊魂楊柳眉侵顰黛損芙蓉面零
脂落粉牡丹芽剪草除根其風致不減元人小山

甜齋輩、滇人傳唱多訛其字、余爲訂之云、

鎖愁堅辭

鎖愁堅、西域人、扈宋南渡、遂爲杭人、代有詩名、愁堅尤善吟寫、成化間、遊苕城朱文理座間、索賦共家假山、愁堅賦沉醉東風一闋云、風過處香生院宇、雨收時翠溼琴書、移來小朵峰、幻出天然趣、倚闌干、盡日披圖、謾說蓬萊本是虛、只此是神仙洞府、爲一時所稱、

辭品卷之六終

辭品拾遺

成都楊慎升菴著

卓稼翁辭

三山卓用字稼翁能賦馳聲嘗作辭云丈夫執手把吳鈎欲斷萬人頭。因何鐵石打成心性却爲花柔君看項籍并劉季一怒使人愁只因撞虞姬戚氏豪傑都休其爲人溺志可想。

王昂催妝辭

探花王昂榜下擇胥時作催妝辭云喜氣滿門闌。

光動綺羅香陌。行到紫薇花下。悟身非凡客。○不
須脂粉汚太真。嫌怕太紅白。留取黛眉淺處。共畫
草春色。

蕭軫娶再婚

三山蕭軫登第。榜下娶再婚之婦。同舍張任國以
柳稍青辭戲之曰。挂起招牌。一聲喝采。舊店新開。
熟事孩兒家懷老子。畢竟招財。○當初合下安排。
又不豪門買數。自古道正身贊代。見任添差。

平韻憶秦娥

太學服膺齋上舍鄭文秀州人其妻寄以憶秦娥
云花深深一鉤羅襪行花陰閒將梅帶試
結同心日邊消息空沉沉畫眉樓上愁登臨海棠
開後望到如今此辭爲同舍者傳播酒樓妓館皆
歌之以爲歐陽永叔辭非也

劉鼎臣妻辭

婺州劉鼎臣赴省試臨行妻作辭名鵝鴨天云金
屋無人夜剪繒寶釵翻過齒痕輕臨行執手殷勤
送襯取蕭郎兩鬢青○聽祝付好看成千金不抵

此時情明年宴罷瓊林晚酒面微紅相映明。

易祓妻辭

易祓字彥章潭州人以優校爲前廊久不歸其妻作一剪梅辭寄云染淚修書寄彥章貪做前廊忘却回廊功名成遂不還鄉石做心腸鐵做心腸○紅日三竿懶畫妝虛度韶光瘦損容光相思何日得成雙羞對鴛鴦懶對鴛鴦

采奴

東臯雜錄云王定國嶺外歸出歌者勸東坡酒坡

作定風波序云王定國歌兒曰柔奴姓宇文氏眉
目媚麗善應對家世住京師定國南遷歸余問柔
廣南風土應是不好柔對曰此心安處便是吾鄉
因爲綴此辭云常美人間琢玉郎天教分付點酥
娘自作清歌傳皓齒風起雪飛炎海變清涼○萬
里歸來年愈少微笑笑時猶帶嶺梅香試問嶺南
應不好却道此心安處是吾鄉

美奴

苕溪漁隱曰陸敦禮藻有侍兒名美奴善綴辭出

侑樽俎。每丐韻于坐客。頃刻成章。卜筭子云。送我
出東門。乍別長安道。兩岸垂楊鎖暮煙。正是秋光
老。○一曲古陽關。莫惜金樽倒。君向瀟湘我向秦。
魚鷺何時到。如夢令云。日暮馬嘶人去。船逐清波
東注。後夜最高樓。還肯思量人否。無緒無緒。生怕
黃昏疎雨。

李師師

李師師。汴京名妓。張子野爲製新辭。名師師令略
云。蜀綵衣長勝未起。縱亂雲垂地。正值殘英和月

墜寄此情千里。秦少游亦贈之。辭云：看徧潁川花。
不似師師好。後徽宗微行幸之。見宣和遺事。甕天
脞語。又載宋江潛至李師師家。題一辭於壁云：天
南地北。問乾坤何處可容狂客。借得山東煙水寨。
來買鳳城春色。翠袖圍香。縠綃籠玉。一笑千金值。
神仙體態薄。倅如何銷得。想蘆葉灘頭。蓼花汀畔。
皓月空凝碧。六六鴈行連八九。只待金鷄消息。
義膽包天。忠肝蓋地。四海無人識。閒愁萬種。醉鄉
一夜頭白。小辭盛於宋。而劇賊亦工如此。

于湖南鄉子

張于湖送朱元晦行與張欽夫邢少連同集作南
鄉子一詞云江上送歸船風雨排空浪拍天賴有
清樽澆別恨悽然寶燭燒花看吸川○楚舞對湘
弦暖響圍春錦帳毡坐上定知無俗客俱賢便是
朱張與少連此詞見蘭畹集觀楚舞湘弦之句及
朱文公雲谷寄友絕句云日暮天寒無酒飲不須
空喚莫愁來則晦翁於宴席未嘗不用妓廣平之
賦梅花又司馬公亦有艷辭亦何傷於清介乎

珠簾秀

姓朱氏行第四雜劇爲當今獨步駕頭花旦軟末
泥等悉造其妙胡紫山宣慰嘗以沉醉東風曲贈
云錦織江邊翠竹紱穿海上明珠月淡時風清處
都隔斷落紅塵土一片閒情任卷舒挂盡朝雲暮
雨馮海粟待制亦贈以鷓鴣天云憑倚東風遠映
樓流鶯窺面燕低頭蝦鬚瘦影纖纖織龜背香紋
細細浮○紅霧斂彩雲收海霞爲帶月爲鉤夜來
捲盡西山兩不著人間半點愁蓋朱背微僂馮故

以簾鈎寓意，至今後輩以朱娘娘稱之者。

趙真真楊玉娥

趙真真楊玉娥善唱諸宮調。楊立齋見其謳張五牛商正叔所編雙漸小卿怨，因作鵝鵠天哨遍要孩兒煞以詠之後曲多不錄，今錄前曲云：煙柳風花錦作園。霜芽露葉玉裝船。誰知皓齒纖腰會只在輕衫短帽邊。○啼玉靨，咽冰絃。五牛身去更無傳。辭人老筆佳人口。再喚春風在眼前。

劉燕歌

劉燕歌善歌舞齊叅議還山東劉賦太常引以餞
云故人別我出陽關無計鎖雕鞍今古別離難况
隔斷蛾眉遠山○一樽別酒一聲杜宇寂寞又春
殘明月小樓閒第一夜相思泪彈至今膾炙人口

杜妙隆

杜妙隆金陵佳麗人也盧疎齊欲見之行李匆匆
不果所願因題踏莎行於壁云雪暗山明溪深花
早行人馬上詩成了歸來聞說妙隆歌金陵却比
蓬萊渺○寶鏡慵窺王容空好梁塵不動歌聲悄

無人知我此時春風一枕松牕曉

宋六嫂

宋六嫂小字同壽元遺山有贈戚栗工張觜兒辭卽其父也宋與其夫合樂妙入神品蓋宋善謳其

夫能傳其父之藝滕玉霄待制嘗賦念奴嬌以贈

云柳翬花因云辭見第五卷念奴嬌一名百子

令

一分兒

一分兒姓王氏京師角坡也歌舞絕倫聰慧無比

一日丁指揮會才人劉士昌程繼善等於江鄉園
小飲。王氏佐樽，時有小姬歌菊花會南呂曲云：紅
葉落火龍褪甲，青松枯惟蟒張牙。丁曰：此沉醉東
風首句也。王氏可足成之。王應聲曰：紅葉落火龍
褪甲，青松枯惟蟒張牙。可詠題堪描畫，喜觥籌席
上交雜答刺蘇頻斟，入禮廝麻不醉呵。休扶上馬
一座歎賞。由是聲價愈重焉。

辭品拾遺

三二六



